



Jumat, 13 Juli 2022

Ogen: Esekiel 44:4-9



Kerabangen Si Ibentasi Anak-anak Tuhan



Esekiel datang dengan ibabai Malaikat Tuhan erdalan i tekelewe rumah pertoton. Tupung Esekiel arah utara rumah pertoton i idahna maka rumah pertoton e idemi alu sinalsal terang ikemuliaan Tuhan. Je nari ibegina sora Tuhan ngerana man bana kerna aturen ise saja si banci bengket ku rumah pertoton arah kerabangen si enggo isikapken. Tuhan enggo erbahan sada aturen maka si bengket ku bas rumah pertoton e e me bangsa Israel si enggo isunat rikutken aturen agama Jahudi. Bangsa Israel e bangsa pilihan Tuhan. Bangsa e arus ngikutken aturen Tuhan, janah setia man Tuhan si enggo mulahi ia i bas perbudaken Mesir nari. Aturen e situhuna enggo jadi ketetapan i bas kalak Jahudi.

Kinatana, bangsa Israel berontak man Tuhan. Iliamina rumah pertoton si badia e alu maba bangsa si deban si la ersunat, bangsa si la ngikutken Tuhan bengket ku bas rumah pertoton e. Bangsa Israel ngelanggar kerina aturen si ibahan Tuhan man bana. Perbahanen bangsa e erbahansa ciga ate Tuhan natap-natapsa.

Arah penuri-nuri Tuhan man Esekiel si dat piga-piga pelajaren guna mpegegehi kinitekenta: sipemena, Tuhan erngena ate ku bas kebadian. Si bengket ku bas rumah pertoton e arus badia. Situhuna kebadian e Tuhan nge si merekensa, alu ersunat bangsa Israel enggo ibadiakenNa. Si peduaken, Tuhan erciga ate nandangi kalak si la njagai kebadian dirina, alu nggit denga ergaul entah erjabu ras si lenga ipebadiaken Dibata. Sipeteluken, Tuhan ngukum kalak si ngeliami rumah pertoton, si mabai bangsa si la nandai Dibata bengket ku rumah pertoton. Si iarapken Dibata i bas kita nari, njagai kebadian diri, lanai ngikuti sura-sura daging, erlajar patuh ngikutken sura-sura Tuhan. Kita me si banci erdalan arah kerabangen lako bengket ku rumah pertoton.

Kesetian man Dibata e teridah arah kepatuhen.

